

- प्रदेशभर मांय रंगां रो तिवार होळी रीत मुजब उमाव रे साथे मनायी ज्यो।
- मुख्यमंत्री भजन लाल शर्मा जयपुर मांय आप रा रहवास माथे रंगोत्सव कार्यक्रम मांय सिरकत करी।
- देशभर मांय पीएम सूर्य घर मुफ्त बिजली योजना मांय लाभार्थियां री तादाद 10 लाख रे पार।
- प्रदेश मांय केई ठौड़ा व्ही बिरखा ऊं तापमान मांय मामूली कमी-कुछ ठौड़ा ओळा पडण रा समचार।

000

प्रदेशभर मांय आज रंगां रो तिवार होळी उमाव रे साथे मनायो जावे। संवारा ऊं ई टाबर, महिलावां अर बुजुर्ग एक-दूजा रे रंग गुलाल लगा र होळी री शुभकामनावां दे रीया है। धुलण्डी रे मौके मिन्दरां मांय ई भजन-कीर्तन अर रंगोत्सव रा आयोजनां मांय दर्शनार्थियां री भीड़ निजर आई। करौली रा नामी मदन मोहन मिन्दर अर चित्तौड़गढ़ रा सांवलिया जी मिन्दर मांय ई घणी तादाद मांय सिरधालू पूर्या। राजधानी जयपुर मांय ई होळी रो उमाव निजर आयो। शहर रा गोविन्द देव जी मिंदर मांय घणी तादाद मांय जुट्या सिरधालूआं आप रा आराध्य रा दर्शन कर ने फागोत्सव मांय शिरकत करी। वटे ई होटल खासाकोठी मांय विदेशी सैलाणियां सारू खास होळी जळसो आयोजित करी ज्यो। ई कार्यक्रम मांय सैलाणियां लोक कलाकारां री प्रस्तुतियां रे साथे होळी रो आनंद लियो। राजभवन मांय होळी रो तिवार हरक रे साथे मनायी ज्यो। ढोल अर चंग री थाप माथे लोक कलाकारां शानदार प्रस्तुतियां दी। राज्यपाल हरिभाऊ बागडे मेहमानां रे गुलाल लगा र मान कर्यो अर होळी री शुभकामनावां दी। मुख्यमंत्री भजनलाल शर्मा रा जयपुर रहवास माथे रंगोत्सव कार्यक्रम व्ह्यो। ई मौके समाज रा न्यारा न्यारा तबकां रा लोगां मुख्यमंत्री रे गुलाल लेगा र शुभकामनावां दी। श्री शर्मा ई दौरान घणी तादाद मांय लोगां रे साथे प्राकृतिक रंगा अर फूलां ऊं होळी खेली। मुख्यमंत्री लोगां ऊं बेर ने भुला र होळी रा रंगां मांय सराबोर होवण री अरज करी।

ई मौके लोक कलाकारां मोवणी प्रस्तुतियां ऊं ब्रज री संस्कृति ने साकार कर दिया।

लोकसभा अध्यक्ष ओम बिरला आज होळी रो तिवार कोटा मांय मनायो। मीडिया ऊं बतळ मांय वणा होळी माथे सामजिक समरसता रो संदेश दियो।

पैली रा मुख्यमंत्री अशोक गहलोत जयपुर मांय आप रा रहवास माथे लोगां ऊं मिल्या अर होळी री शुभकामनावां दी। चूरू मांय होळी रो तिवार हरक रे साथे मनायी ज्यो। झुन्झुनू मांय धुलण्डी रे मौके खैमी शक्ति मिंदर मांय फूलां री होळी खेली ज्यी। वटे ई मण्डावा मांय घणी तादाद मांय विदेशी सैलाणियां लोक गीतां अर विदेशी धुनां माथे जम ने नाच कर्यो। झालावाड़ा जिला मांय ई होळी रो तिवार रीत मुजब उमाव रे साथे मनायी ज्यो। झालरापाटन मांय द्वारिकाधीश मिन्दर मांय फागोत्सव रे दौरान भक्तां भगवान श्री कृष्ण रे साथे होळी खेली। स्वर्ण नगरी जैसलमेर मांय धुलण्डी रे मौके सोनार दुर्ग रा लक्ष्मीनारायण मिन्दर मांय फागोत्सव रो आयोजन व्ह्यो। सोनार किला रा व्यास मोहल्ला मांय बादशाह अर शहजाता री सावारी निकाळी ज्यी। पाली मांय सांसद मदन राठौड़ वठा रा लोगां रे साथे होळी खेली अर शुभकामनावां दी। राजसमंद जिला रा श्रीनाथ जी मिन्दर मांय डोलोत्सव मनायी ज्यो अर अबीर गुलाल उड़ाई ज्यी। और ब्यौरो म्हाणा खबरनवीस ऊं-

सवाईमाधोपुर जिला मांय रणथम्भौर रोड़ रा होटलां मांय सांस्कृतिक अर रंगारंग कार्यक्रमां रो आयोजन करी ज्यो। भीलवाड़ा जिला रा शाहपुरा मांय आज रामरुनेही सम्प्रदाय रो सालाना फूलडोल महोत्सव सुरू व्ह्यो। ओ महोत्सव उन्नीस मार्च ताई चालेला।

राष्ट्रपति द्रौपदी मुर्मू अर उपराष्ट्रपति जगदीप धनखड़ देशवासियां ने होळी री शुभकामनावां देवता ई तिवार ने एकता रा रंग ने मजबूत करण वाळो बताया है। प्रधानमंत्री नरेन्द्र मोदी आप रा बधाई संदेश मांय होळी रा पवित्र पर्व ने नुवी ऊर्जा रो संचार करण वाळो बताया है। होळी अर रमजान रा जुम्मा एक ई दिन पडण रे कारण प्रशासन पूरी तरह सावचेत है। प्रदेशभर मांय होळी ने ले र हिफाजत रा करड़ा बन्दोवन्त करी ज्या है, संवेदनशील हलका मांय सीसीटीवी ऊं निगे राखी जावे। प्रदेशभर मांय काले पुलिसकर्मी होळी खेलेला।

000

केंद्रीय विज्ञान अर प्रौद्योगिकी राज्य मंत्री जितेंद्र सिंह कह्यो है के अगूणी हलकां विकसित भारत रा सपना ने साकार करण मांय महताऊ भूमिका निभा रीया है। अ हलका देश भर मांय केसर री खेती आगला महताऊ केन्द्र ई बणेला। आज शिलांग मांय नॉर्थ ईस्ट सेंटर फॉर टेक्नोलॉजी एप्लीकेशन एंड

रीच रा नुवां परिसर री नींव धरता श्री सिंह ने कह्यो के सरकार री मिशन केसर पहल रे तैत साल 2021 ऊं सिक्किम, अरुणाचल प्रदेश अर मेघालय मांय केसर री खेती करी जावे। श्री सिंह बतायो के अरुणाचल प्रदेश रा मेंचुखा अर सिक्किम रा युक्सोम मांय अबै मोटा पैमाना माथे केसर री खेती करी जाय री है। इण ने नगालैंड अर मणिपुर ताई बधावण री योजना है। इण ऊं पूर्वोत्तर हलका जम्मू-कश्मीर रा पंपोर रे पछे भारत रा आवता महताऊ केसर उत्पादन हलको बण जायेला।

000

रिजर्व बैंक रा गवर्नर संजय मल्होत्रा कह्यो है के भारत नवीकरणीय ऊर्जा परियोजनावां ने **‘प्राथमिक क्षेत्र ऋण’** मांय भेळा कर ने वां ने रोकड़ देवण मांय अगवा भूमिका निभाई है। इण ऊं जलवायु बदलाव रे खिलाफ देश री लड़ाई मांय तेजी आयी है। नुवी दिल्ली मांय काले **‘जलवायु परिवर्तन—जोखिम और वित्त’** रा बारा मांय एक संगोष्ठी मांय बोलता वणा कह्यो के विकासशील अर्थव्यवस्थावां मांय केंद्रीय बैंकां ने आप रा देश री हालात ने देखता कुछ हलका सारु निर्देशित कर्ज नीतियां ने अपणाया है। श्री मल्होत्रा कह्यो के देश मांय नवीकरणीय ऊर्जा परियोजनावां जिण मांय सौर, बायोमास, पवन चक्कियां अर सौर ऊर्जा आधारित स्ट्रीट लाइटिंग प्रणाली अर दूरदराज रा गांवां मांय विद्युतीकरण परियोजनावां ने कर्ज मंजूर करण सारु प्राथमिकता वाळा हलका मानी ज्या है।

000

दुनिया री सब ऊं मोटी घरेलू सौर ऊर्जा पहल—**पीएम सूर्य घर मुफ्त बिजली योजना** ऊं 10 लाख लाभार्थियां री कामयाबी हासिल करी है। लारली साल फरवरी मांय सरु व्ही ई योजना रा तैत अजै ताई 6 लाख ऊं बत्ती लाभार्थियां ने सब्सिडी रा रूप मांय 4 हजार 770 करोड़ रिप्यां ऊं बत्ती री रकम दी जा चुकी है।

000

युवा मामला अर खेल मंत्रालय खेलां मांय उम्र रा बारा मांय धोखाधड़ी रे खिलाफ राष्ट्रीय संहिता 2025 रा मसौदा माथे लोगां अर हितधारकां री राय मांगी है। इण रो मकसद आयु धोखाधड़ी ने कम करणो अर वास्तविक एथलीटां री हिफाजत करणो है। आ संहिता आयु रिकॉर्ड मांय हेराफेरी करण रा दोषी मिलण वाळा एथलीट, कोच अर अहलकारां माथे करड़ा दण्ड लागू करेला।

000

भारत दिल्ली मांय **विश्व पैरा एथलेटिक्स ग्रैंड-प्री 2025** मांय शानदार नुमाईश करता 45 सोना रा, 40 चांदी रा अर 49 कांसी रा तमगा समेत कुल 134 तमगा रे साथे पदक तालिका मांय ठावी ठौड़ा माथे रीयो। भारतीय एथलीट्स ट्रैक एंड फील्ड होड़ा मांय कमाल रो प्रदर्शन कर्यो। पुरुष गोळा फैंक मांय भारत सगळा तमगा जित लिया। भारत रा सागर 11 दशमलव चार—सात मीटर ताई गोळो फैंक ने सोना रा तमगो जित्यो। जंका सिंह चांदी रो अर बालाजी राजेन्द्रन कासी रो तमगो जित्यो। पुरुषा री 200 मीटर दौड़ मांय भारत रा विनय चांदी अर अभिषेक बाबा साहिब जाधव कासी रा तमगा माथे कब्जो जमायो। महिलावां री 200 मीटर होड़ा मांय भारत री प्रीति पाल कांसी रो मेडल आप रे नाम कर्यो।

000

प्रदेश मांय लारला 24 घंटा मांय सीकर, भरतपुर, दौसा, अलवर, बीकानेर, श्रीगंगानगर, चूरु, झुन्झुनू, अर जयपुर समेत केई जिलां मांय बिरखा व्ही। वठे केई ठौड़ां ओळा पडण रा ई समचार है। मौसम मांय बदलाव ऊं केई ठौड़ां तापमान मांय मामूली कमी दर्ज करी ज्यी है। झुन्झुनू जिला रा मलसीसर, टमकोर अर पिलानी हलका मांय केई ठौड़ां ओळा पड्यो। और ब्यौरो म्हाणा खबरनवीस ऊं—
हनुमानगढ़ जिला मांय दोपहरा पाछे हळको छाटा—छिडको व्ह्यो। पाली मांय आज सवारां ऊं ई बादळ छाया ज्यी रीया अर मौसम सुहावणो बण्योडो है। मौसम महकमो आथूणी विक्षोभ रो असर आज अर काले ई बण्यो रहवण री आस जतायी है। आज 8 जिला अर काले 11 जिला मांय आंधी, बिरखा रो येलो अलर्ट जारी करी ज्यो है।

000